

Reiwelskerjen

5.8.-8.8.88

Fest

KELLERGEISTER - CLUB
POLTSKIRKEN



Kerwered 1988

Ehr liewe Leid un Kerwegüschd,
herzlich willkomme zu unserm Feschd.
Wo mer so richdich kann vun Herze,
met voller Kraft enin sich sterze.
Es werd gelachd, es is was los
un manscher schießt sich in die Hos.
Bin ich jetzt drin orrer bin ich's net
wär se doch schon erum die Kerwered.
Mer spanne eich net länger uf die Folter,
jetzt geht's los mit holter di polter.

Mer harre vorsjohr e ganz schee großes Maul
awer de Axel der war gar net faul.
"Axel losses saufe sin, schunschd geb's am
En doch kä kin!"
So hammer vorsjohr noch iwer 'ne gelachd,
awer er hot seiner Fra dann doch noch e Kind
gemach.
De klä Christian is im März uf die Welt kum
un schon is de Axel vun de Bildfläch verschwun.

Lieber Axel loss der sae
kum mo met deim Kinnerwae
durch die Reiwelskeier Gosse
direkt uf de Keller zugeschosse
der Klä mus doch richdich gedeie
deshalb du mer ne mit Bischof inweie.

Mir geh'n jetzt vum Axel zum Peter iwer,
weil bei däm gab's ach e ganz schä Gewidder.
Er hot gemänd er mischds em Axel nohmache
un sich ach glei e Kind ohschaffe.
In Mäsem in ännner Werdschafd do is 'es baserd,
do is de Peter zu Melanie mascheerd.
Er hod's dort glei kenne un liewe gelernd
un nachd's do hot er's dann gewärmd.
Wie er geheerd daß es Melanie schwanger is,
do isser zum Parre gerennt
un hot es Ufgebot benennt.
De Peter hot jetzt sei Weche gefun,
im November werd sei Kind entbun.

Liewer Peter kumm mo widder in de Keller
ännner schligge,
wenn dei Kind erschd mol do is
kannsche noch genuch de Kinnerwae drigge.

Jetzt her ich mo uf iwer annere se hetze,
un du mich selwer in die Midde rinsetze.
Ich wollt widder e mol e Gesprächsthema sin
un han gemänd am beschde gehd's mit Fra un Kind.
Ich hammer e Beispiel an dene zwä vor mer genum,
un ach die Awet e mol ufgenum.

De Werner un de Wilhelm waren zwar
die ganz Zeit iwer net begeischderd,
awer wie klar war ihr Enkelche Natalie is do,
do war'n se faschd ins Koma gefloh.
Die wollde sich gar nimie vun dämm Knoddelche trenne
un nur noch in ihr Arme nemme.

Mir drei mir hann eich gezeichd wie's gehd,
damit Reiwelskeie ach in Zukunft noch weider lebt.

Mir hann in Reiwelskeie änner hause
der hot seit eh un jeh nix se mause.
do hod 'er gedengt ich bau mer e Haus,
das siehd fer e Märe doch ganz anershd aus.
Es Haus is ferdich die Mewel schdehn drin,
was jetzt noch fehld sin e Fra un e Kin!
Allä e Fra se finne is doch net so schwer
- ei Arno was e Maleer.

Detsche dich net immer hierm Ofe verkrische,
sondern ach e mo in Disco's rumrieche
hätsche es richdiche Märe schon gefun
un ach glei met häm genum.

Un Arno, die Moral vun der Geschicht,
Ohne Fraue lohnd sich es baue nicht!!!

Gejeiwwer vum *Lydia* do hammer e Abgesander
wohne
vun der Firma "Gott, Himmel & Sohne."
"Mit Gott an meiner Seite un Jesus in
Ännem Boot
entwisch ich sogar dem Unfalltod."
Dene Gedanke hot er sich genum
un de Kadett gut in de Grawe gebrung.
Er is vun Lautre hüm gedüst
un hot das beinah met seim Lewe ingebüst.
Am Ingwiller honne sei Fahrkünschde verloß
un er is in voller Fahrt uff em Dach weider
Richtung Heimat geschoß.

Es Lisabeth is vun de Awet hüm kumm
un hot de Rigo uff em Dach gefun.
Es is klei hüm un hot Hilfe geholt,
wies widder kum is hot es Tanja em Rigo klei gedrohd.

"Mei lieber Rigo fräh Dich net zu frie,
Du hosch es Hedwig heit noch net gesieh.
De Rigo is hüm es war em ganz bang
awwer so schlecht isses em gar net gang.
De Rigo hot dann e nei Auto kriet,
un is met dem dann ach uffgeblieht.

E paar Monat speder hots Hedwig als
emanzipierte Frau, ach sei Audi uffs Dach gehau.
Ach sei Auto hot jetzt ganz schee viel Delle,
uns Hedwig kann nimmi mem Rigo schelle.
Es steht jetzt 1 : 1 er Leit wollener Tibbe
wer als negschder dut sei Auto umkippe.

Rigo un Hedwig lossen oich vun mer was saag
"Farnuff de Stroß un net newe dra."

Vorsjohr han ich noch do gestann,
un de Detlef e "cleverer Geschäftsman" genann.
Jedoch er hot zuviel in sei Ohgebod ufgenum,
un das hot ne de Berch ach widder enunner gebrung.
De Bischoff in Winnwiller hot nämlich neie
Edikedde rausbrung,
awer de Detlef hot immer noch aldes Bier
vum em Ginswillerer Großhändler genumm.
Das Bier das mer kaaf han war eifersch mol
schlehd
also sowas is wohl kännem rechd.
Desweje hammer uns nohme neie Bierlieferande
umgeguckd
un em Detlefche vor die Deer geschpuckd.
Der konnt das gar net verstehe
do isser mo kum um nohm rechde se sehe.
Wie er e nunner kum is hot ne faschd de Schlaach
gedrof,
do hommer uns nämlich met Bier aus Nußbach besoff.
"Wenn ich de Keller als Kundschaft verleer"
denkt er
"is das noch net e mol so e großes Maleer.
Ich hab jo noch de Reschd vun Reiwelskeie
hinner mer schdehe,
un die wern doch net zu em Nußbacher gehe."
Die Kalkulation hot de Detlef ganz falsch ohgesetzt,
weil die Reiwelskeier Alde sin em Keller bis noh
Nußbach nohgewetzt.
Dach un Nachd hoder vor seinem Geschäfd uf
Kundschaft gewat,
in de Hoffnung, daß noch ännere Kaschde
Detlefbier häm drad.
Un noh e paar Monat hodder gemergd,
daß das nie widder de Fall sin werd.
Do hodder halt sei Geschäftche geschlos
un weje dere Sach kä Träne mie vergoß.

Liewer Detlef jetzt griesches noch e mol gesat,
met dem alde faule Bier hosche dir dei ganz
Kundschaft verjat.

Ich muß jetzt emol vun Euch ablenke
un emol an unser brave Innwohner denge.
Donäwe do wohne zwä junge Mäid,
ich glab die nämme mer mo uff in unser Gebet.
Eigentlich sinse joh se dritt,
do iwe Kleine Anette zieht jo ach met dene mit.
Awer Moment, ziehe is jo do zuviel gesah
ich glaab die han noch kä Penning irgendwo hie getra.
Mer wollde jo schunn e Fescht organisiere
do häden se sich a gar net misse scheniere.
Do hätten dann ach e paar Buwe gehockt,
ach Gott, han ich Eich jetzt geschockt??

Is dann bei Euch es Mittelalter noch net erum,
hanner immer noch e Keuchheitsgertel um??
Mensch Maier er han jo iwverhaupt kä Ahnung
kommen raus un sammele Erfahrung.
Fahn doch mol uff e Musik was trinke e bisje danze,
do hanner bestimmt a e paar Chance,
den se finne wo Euch gefällt,
un Euch ebbes zeigt fun de männliche Welt.

Ich hack jetzt gar nimmi weiter uff Eich erum
hoffentlich fiehle ner Eich wohl in eierm Jungfrautum.

Ehr Musiker spele jetzt ganz im Vertraue:
wer dut uns jetzt die Schüchternheit klaue,
damit mer krie was mer schun lang vermisse
es drinke, es danze un vor allem es küsse!

An de letschde Gemänderatsitzung, do is'es baseerd,
do sin die Reiwelskeier Champs an de Keller mascheerd.
Ich han mer gedengd die muß ich emo belausche,
do her ich beschdimmd was fer in de Kerwered ordentlich
ufsebausche.

Un wie's Gewidder han ich's vernua,
do is vum " klaine Häuptling " folchendes kumm:

"Em Hanaclor sei Mann hot wie e Doller
an em Beddonklotz erungebollerd.

Un jetzt hoder dene ganze Dreck,
hinne an de Dach verschdegd!"

Mohm Schutttabladesetz is das jo verbot,
hot sich de Robert gedengt in seiner Not.

Awer privat ohzeiche wollt er ne net,
sunscht grechd'er vielleicht ach noch ab sei Fett!

Er hot do hinne nümlich ach sei Meschd annegeworf
un wär vum Kinner Gejechzeich bedroff!!!

Was mache? hod'er sich gedengd

un mem Karl e Schwitzche ingelengt.

So vum weche Umweltverschmutzung, midde im Herz vum de
eichene Gemä,

das fand de Karl dann ach net schü.

Se zwet han se dana geriweld,

un e gemeinsamer Plan ausgediweld.

Die Ohzeich wolle se jetzt iwer die Gemä laafe losse
doch dodemit han se de Fock dann endgüldich abgeschosse.

Weil wenn der Robert net si'e kann de Bedon im fremde Garde,
soller sich net hinner de ganze Gemä vergrabe,

sondern soll allä zu de Bulle geje

un fer sei Ohzeiche grad ze schdehe!

Also Robert los der's sa'e,

mach dei Ohzeiche in Zukunft alla!!!

So Hannelor ich glaab die Leid warde schun lang uf dich
un mir han der ach das Jahr widder e Platz in de
Kerwered ingerichd.

Bidde vergeb uns, mir kenne joh nix de zu
wer do sovel ohstelld das bisch doch du.
Also verzehle mer de Leit mol die Geschicht
vum Hexenachtfeschd,

weil do war dei Benemme werglich net es beschd.
Iwer dei Kedde hammer e Fußabstreifer driwer lee wolle
awer du hosch glei ohgefang se grolle.

Dei Mann hot sogä e Beilche in de Hand gehalt,
also do hadde mer's Hexe dann endgüldich satt.

Mir war'n bees vun dir enttäuscht,
weil du hasch do Flüche errausgekreucht,
es Krause Sabine hosche e "dummi Schlamp" genennt
do simmer dann liewer weg gerennt.

Un außerdem därf mer jetzt ach iwer eier Trottwae laafe
wem'mer beim Bäcker e babich Bretche dud kaafe.

Mei liewer Hermann, es mußd jo net sin,
awer do bische jetzt ach widder drin.

Um vun dir widder uf's Hannelor serig se kumme,
do laafe noch mehr Dinger so krumme.

Ihr zwä sin äfach e heißes Paar,
do hot sich nämlich noch e Geschichde zuggedrah.

Dei Mann hot sich gesad, unser Nachbar de Emil hot gemähnd
de ganze Hof is sei

do zieh ich e Kreidestrich, no dem Motto
das is mei, un das is dei.

De Emil hot gemähnd das wär e Witz,
un hot de Strich bei Audobutze weggespritzt.

Unser Hannelor hot das gesieh,
schnappt sich e Besem un rennt hie.

Sei Mann kumnt em de Besem grad noch so entreiße,
der Banause, awer de Emil hot trotzdem gried e paar Bause.
Mei lieb Hannelor loß der san,
es werd heitsedachs net mit Besem erumgeschla!!

Do unne im Eck hammer zwä hogge,
die dun beim Braun in de Nachtschicht ehr Stunne abglobbe.
Met ehr'm gut verdiende Geld wissese net wohi
do hannses hald de Bank gelieh.
Die Bank hot gemänd, mir kumme net noh met Geldausgebbe
nemme ihr's un schmeises in die Hegge!
Ver wegseschmeise war's ne dann se schad,
do han'ses genum ver e neies Bad.
Geld is vun de Bank awer immer noch kumm
do honse de Reschd ver e Sauna un e Solarium genumm.
Em Gina hannse sei Zimmer verklänert
un sich met däm Luxus es Lewe verschenert.
De Zerrer un de Pit die fiehle sich jetzt
faschd pudelwohl
un denke sich, warum solle mer no Spanie
in Urlaub fahre?
De häm is'es genauso schä un mer kann noch
fer e Terrass met Swimming Pool spare.
Jetzt kennese uf jede Fall erschd emol Dah un Nach
noh ihre Marodde schwitze
un misse net in dem herrliche Sunnewedder sitze.
Jetzt fühle nur noch zwä Fraue un e Mann,
damit aus der Sach noch was wärre kann!

Ihr Musikande spiele dene drei e Lied
"Warum hammer die Idee net frier gried?"

Do owe uff de Juchee, do hammer a Waldmensch wohne
wenn er gesoff hot, dann kann er seine quattro net schone.
Im Mäsemer Bistro war er Krefelderkönig,
un hot ver sei Geld getrunck net wenich.
Im nüchterne Kopp hat er dann amo durchkalkuliert,
was mit seim Geld in Roth so passiert.
Bei seim durchschnittliche Krefelderverbrauch in de Woch,
reißt das im Bistro in sei Monatsgehalt a riese Loch.
Un do hot er sich gedenkt ich fahr mo no Roth bei die Rita
in die Kneip,
do macht's a nix wenn ich a bissje länger bleib.
Un in so äner Nacht do warer a bissje Spät,
do iser grad gefahr de Promilleweg.
Es war jo so newelisch vor seine Aue,
do hot er sich gar nimmi getraut uf die Stroß se schaue.
Das war a Fehler vun unserm Horscht, denn er hot net gesieh
das Eck, un schun warer vun de Fahrbahn weg.
Deno hot er sich erscht amo de Schade betracht,
un dodruff glei herzhaft gelacht. Ha Ha Ha!
Er hot gedenkt vun dene 25 Krefelder war äner schlecht
un do han ich gleich amo es Auto geschecht.
Zum Tolick bin ich Waldwesch gefahr,
suncht het sich die Such viel schlimmer zugetrah
do wäre nämlich glei die Grine kumm un hette mir de
Pappedeckel abgenumm.
Es Auto hot er jo ganz schee gedachtelt
un deshalb hot ers jetz a super gespachtelt.
Zum Glück hot er an dem Owend das Auto ver sich allä gepacht
suncht hüt er mit äner Beifahrerin noch Bledsinn gemacht.

So ihr Musikante helfe uns singe im Chor,
"Ohne mei Feldwech do wär ich verlör."

Im Owerdorf do hammer ener wohne
bei dem sin die Feschde gar net ohne,
do hot er sich Aweidskolesche ingelad,
un hot met dene ganschee getaucht.
Die Fete is gang bis tief in die Nacht,
bis sich de Ernst gelet hot in sei Schlofgemach.
De Kolesch un sei Fra muscht er in sei Wohnwa bitte,
weil er sunscht hat ke freie Bett.
Die zwä hun im Wohnwa noch ziemlich lang un laut gelacht,
bes sich unser Zeitungsfra uff ihr üblicher Weg gemacht.
Do hots sei Neigier in die Weiwiss' getrah,
weil dort han zwä ziemlich laut gegesch.
Do hots gewackelt un gekracht in alle Egge,
uns Herts kunt sich vor schreck nimmi redde.
Es hot gedenkt was sinn das ver obszöne Spiele,
un hot am nägschde Haus glei was zu verzele.
An de Ginswillerer Kerb hun se de Ernst druf ogesproch
do druf issen glei rot ogeloff.

Wenn ich eich a guter Rot gewe darf
gewen es nägschde mo de Aweidskolesche eier Schlofgemach,
un ihr gehn in de Wohnwahe,
do dut sich ach nix zutrahe.

Ach de Sonny konde mer Dasjohr net vergesse,
weil der war fer die disjohrich Kerwered e gefunnenes Fresse.
Vorsjohr hammer ne noch verklaat,
weil er uns an Silweschder '86/'87 net ufgemach hat.
Das hammer dann in die Kerwered gebrung
un das han'se uns anscheind üwel genum.
Weil wie 'mer an Kerwemondach geklingelt hon,
do is künner met Eier orrer Worschddose kom.
Es Schdernche hammer noch gesieh
die Gardine han ach gewaggelt,
awer zu de Deer kam's net gedaggelt.
Mit han do geschdan, wie begossene Pudel,
dann hammer se verbuchd mem ganze Rudel.
E halb Johr späder war Silweschder ohgesad,
un mir han widder met de ganz Mannschaft beim Sonny
vor de Deer gewaat.
Dann is es unglaublichde Ding basserd,
es Schdernche is zu de Deer mascheerd.
Uf denne Schock simmer ingekehrd,
un han die gude Dinge all mol durch proweerd.
Dodezu hammer sei heiße Musik geheerd,
awer die hat uns in unserm Suff ach nimmi geschderd.
Mir war'n voll, die Bar geschloss,
un mir han uns im Reschd vum Dorf noch weider begoß.

Das war so schä wie mer vor 'ner offene Deer geschdan,
SONNY JETZT BISCH E SONNHARD E RICHDICHER MANN!!!

Ehr Musigande speele ganz clor:
Seit Silvester hot de Sonny e uffenes Dor.

Mir mache jetzt mo langsam Schluß,
weil ich e bische was dringe muß.
Ach noch was !
Halle Eier, Wein un Worscht bereid,
moje kännener kumme zur Essenszeit.
Un noch was: wenn eich die Schdige iwer
eich net so gefalle,
dann dun net glei mir ünni knalle.
Ich mähn ihr sin jo selwer Schuld
hann met uns Junge e bische Geduld.
Un dun's es nägschd Jahr widder mehr treibe,
sunschd ham mer do doch nix se schreiwe.
Jetzt kännener all in die Hall rinkumme,
weil dort werd jetzt ordentlich gesoff un gesunge.
Doch die erschde drei Lieder missener die Tanzflüch meide,
dort dut die Straußjuchend jetzt ihr Unwese treiwe.

Die Reiwelskeierkerb soll lewe - Hoch!